

# Alàri Paul

# Oubreto

Marsiho

1958

A GUIISO DE PREFACI

Seguramen, ère pas lou mai qualifica pèr presenta aquelo drudo meissoun daurado de pouèmo que tant de tèms, dins uno moudestio inimaginablo Alàri, Paul, avié à-cha-pau engarbeirado e escoundudo dins soun granié.

N'a faugu de suplicacioun de la part de sis ami pèr lou decida à traire de tant de bèllis espigo lou gran d'or de si pantai e de lou semoundre en tóuti aquéli qu'an fam de pouèsio e d'un o pouèsio enmusicado au balans de la lengo de noste brès.

Es bessai amor que siéu esta un de si secutaire qu'Alàri, Paul, en disènt sebo, m'a leissa la cargo, cargo pleno d'ounour de me n'esplica emé li legèire.

Me n'escuse proche d'éli.

Sarié faire plòure de verita premiero que de declara qu'Alàri, Paul, es un Prouvençau de la costo pleno, qu'es nascu pouèto e felibre en meme tèms. Es éu que nous lou vai dire.

A soun païs nadau, Lourmarin, ounte lou vènt dóu Leberoun i'a boufa l'esperit poueti, aquéu proumier óumage:

Lourmarin! Lourmarin! O moun pichot vilage!  
Que siéu uros de te revèire, acata  
Sout toun reloge vièi que sèmblo t'assousta  
Dóu daut de toun roucas! Au mitan dis erbage...

Mai Lourmarin e la Prouvènço fan qu'un dins lou cor abraza de l'autour:

O ma Prouvènço! o ma Maire!  
Tu que m'as vist naisse enfantoun  
Au pèd de l'aspre Leberoun,  
Toujour sarai toun adouraire.  
Tout ço que tène vèn de tu,

E se te cante, vièi troubaire,  
Es que me revèn de tout caire  
Li bèu resson de ti vertu.  
Ah! Te benisse, ma divesso!  
Encuei, acrasa dis afan,  
Trove sout tis alo en cantant  
Lou soulas de moun amaresso.